

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KETIGA PARLIMEN KEEMPAT  
BELAS TAHUN 2020**

---

**PERTANYAAN : BUKAN LISAN**

**DARIPADA : DATO' SERI HAJI ABDUL HADI BIN AWANG  
[MARANG]**

**TARIKH :**

**SOALAN**

minta **MENTERI PENGAJIAN TINGGI** menyatakan apakah pelan jangka masa panjang Kementerian dalam meningkatkan kualiti institusi pengajian tinggi negara setaraf dengan institusi pengajian tinggi peringkat global.

**JAWAPAN**

Tuan Yang di-Pertua,

Kementerian Pengajian Tinggi (KPT) memberikan perhatian serius terhadap usaha untuk meningkatkan kualiti institusi pendidikan tinggi negara bagi membolehkan ia bersaing sehingga ke peringkat global.

Selaras dengan matlamat kerajaan dan tujuan sistem pendidikan untuk memastikan generasi muda Malaysia dapat berkembang secara holistik; mempunyai nilai-nilai murni; ilmu dan kemahiran yang diperlukan bagi menerajui negara, KPT telah membangunkan Pelan Pembangunan Pendidikan Malaysia 2015-2025 (Pendidikan Tinggi) atau dikenali sebagai PPPM(PT). Penghasilan pelan tersebut melibatkan sesi libat urus dengan pihak yang berkepentingan, pemain industri dan pihak lain yang berkaitan dalam ekosistem pendidikan tinggi seperti pakar antarabangsa daripada organisasi seperti *United Nations Educational; Scientific and Cultural Organisation (UNESCO); The World Bank; Scopus; Universitas 21 (U21) Global* dan *Organisation for Economic Co-operation and Development (OECD)*. Input daripada pakar dan pihak

yang pelbagai, telah membantu menghasilkan sebuah pelan yang komprehensif bagi memperkuuhkan kualiti institusi pendidikan tinggi agar dapat bersaing sehingga ke peringkat global dan berjaya melahirkan para graduan yang berupaya mendepani persekitaran global yang semakin mencabar.

Melalui pelaksanaan pelan pembangunan pendidikan tersebut, institusi pendidikan tinggi di Malaysia telah menunjukkan pencapaian yang amat membanggakan yang mana lima (5) universiti awam telah berjaya melonjakkan kedudukan atau *ranking* dalam *Quacquarelli Symonds (QS) World University Rankings* tahun 2021 dengan menduduki 200 tangga teratas universiti dunia. Universiti awam tersebut adalah Universiti Malaya di tangga ke-59, Universiti Putra Malaysia di tangga 132, Universiti Kebangsaan Malaysia di tangga 141, Universiti Sains Malaysia di tangga 142 dan Universiti Teknologi Malaysia di tangga 187. Pencapaian ini membuktikan bahawa PPPM(PT) telah berjaya meningkatkan kualiti institusi pendidikan tinggi negara sehingga boleh bersaing ke peringkat global.

Untuk makluman Ahli Yang Berhormat, sektor pendidikan tinggi negara semakin berkembang dengan pertambahan bilangan Institusi Pengajian Tinggi Swasta (IPTS). IPTS diyakini berupaya menjadi penyumbang yang signifikan kepada Keluaran Dalam Negara Kasar (KDNK). Oleh yang demikian, kementerian telah merancang dan melaksanakan pelbagai pelan untuk meningkatkan kualiti IPTS antaranya adalah:

- i. Pelaksanaan Sistem Raking dan Rating IPTS (SETARA dan MyQUEST);
- ii. Penyediaan “*Way Forward for IPTS: Education as An Industry (2020-2025)*”; dan
- iii. Menubuhkan Pasukan Petugas Kebangsaan Pemudahcara IPTS Sebagai Industri (PEMUDAH IPTS).

Sekian, terima kasih.